



E nie, a la fin, Dree al veve cumbinât di nuviçâ Catine.

Jê, bieles come il soreli, sane di no podê cjalâle cence sossolâ di desideri e, cun di plui, ferbinte e ninine e zentile e tal jet... insome... si sin capîts: une femine di sposâ! E propit par chest, lui al veve cirût di scurtâ i timps dal matrimoni. Da rest, nol vevie fatis di ogni par robâle a chel gnognul di Terenzio, chê femine maraveôse; e dopo par tignî a distance ducj chei moscjons che i ziravin ator. I voleve ben, sigure, i mancjarès po altri, ma za la di des gnocis a vevin scomençât a tichignâsi. Varessin vût di lâ vie tal indoman di sere, par il viaç di gnocis, e a vevin dut il timp par no lassâsi come cjans e lâ a bevi la ultime in sagre e tirâle a la lungje cui amîs di ducj i doi. E ce vûstu che al sedi se a jerin ancjemò vistûts di nuviçs... anzit, no jerie une figade? E po, jere tradizion di zuiâ a la loterie dal purcit! Ma jê signornò... nie di fâ! La di des gnocis bisugnave passâ la gnot insieme, e bla bla bla... vie indilunc cun altris mignagnulis, come se no durmissin za tal stes jet di mê. Si jere cuietade

A maridâ la femine si sta ben un mê, a copâ il purcit si sta ben un an

dome cuant, un cûl di stropâ il Tiliment, Dree al veve imbrocât il pê dal purcit, e lu veve vinçût! La stesse sere, fissade juste un mê dopo di chê date, si jerin metûts dacuardi par purcitâlu!

Une zornade di fieste come pocjis, di tant che vevin bevût e mangjât, ancje se Catine no fermave di cridâ a ducj cuancj par che a sporcjavin chi o a vosavin là.

E al fo propite intant che al meteve te cjanive salams, luianiis e sopresse, pensant a ducj i biei moments che al varès passât cun lôr intai mê che a vevin di vignî, par une cene in companie o denant di une partide di balon, che Dree al scomençâ pardabon a rifleti su chês dôs bestiis maraveosis e su la contentece che une i varès dade di chel moment in poi e chê altre, pûr trop, dopo nancje un mê, e steve za fermant di dâi.

di Rafaêl Serafin

#936